

Նուէրներու, Պատարագի եւ ողորմութիւն ընելու մասին

Աղքատներուն ընդունելութիւնը ընելը շատ օգտակար է ու անոնց աղօթքները Աստուծոյ մօտ են. «Երանելի է ան, որ կը խորհի աղքատին եւ չքաւորին մասին, Տէրը չար օրերէն կը փրկէ զայն, երանելի կ'ընէ երկրի վրայ եւ թշնամիներուն ձեռքը չի մատներ»: (Սաղմոս 41:1-3): Կարիքաւորները կերակրելու երջանկութիւնը այս է, ինչ որ Քրիստոս իրեն համար կատարուած կը նկատէ: Իսկ ի՞նչ պիտի շահիս, երբ ունեւորները խնճոյքի հրաւիրես եւ կամ ի՞նչ պիտի ըլլայ անոր օգուտը: Անօթիներուն համար եղած ընդունելութիւնը օգտակար է, իսկ կուշտերուն համար եղածը՝ ոչ-Քրիստոս չըսաւ. «Յագեցածները կըշտացուցիք» ու նաեւ չըսաւ. «Խմելիք տուիք անոնց, որոնք զինով էին», այլ ըսաւ. «Տեսաք անոնք, որ ծարաւ էին եւ դուք անոնց ջուր տուիք խմելու տեսաք մերկերը ու զանոնք հագցուցիք եւ օտարներուն այցելեցիք»: Նման գործերն են, որ արժանի պիտի ըլլան վարձատրութեան եւ երանութեան եւ ոչ թէ կուշտերուն եւ ունեւորներուն համար եղած կերուխումները, որովհետեւ ան որ աղքատը, կարօտեալը, օտարը, հիւանդը եւ անտունը կը կերակրէ, ոչ թէ մարդ մը, այլ՝ Քրիստոսն է, որ կ'ընդունի, Քրիստոսն է, որ կը մխիթարէ, Քրիստոսն է, որ կը հանգչեցնէ եւ Քրիստոսն է, որ կը ծառայէ, քանզի անսուտ է Տէրունի խօսքը:

Յ. Մանդակունի

Փնտռել գՔրիստոս զայն երկրպագելու նպատակով

«Մենք... եկանք երկրպագելու իրեն» (Մտթ. 2.2): Մոգերը նորածին Փրկիչը տեսնելու հետաքրքրութենէ մղուած չէ, որ կը փնտռէին զինք: Անոնց նպատակը իրեն երկրպագելն էր: Տարբեր նպատակով պէտք է փնտռենք Քրիստոսը: Այսօր որքա՞ն մարդիկ կան, որոնք եկեղեցի կ'երթան ոչ թէ հանդիպելու Քրիստոսի եւ երկրպագելու իրեն, այլ՝ հանդիպելու իրենց բարեկամներուն: Եկեղեցի կ'երթան ո՛չ թէ լսելու Քրիստոսի ձայնը, այլ լսելու բարոզիչին կամ իրարու ձայնը: Ինչպէս մոգերը երբ տուն մտան իրենց ուշադրութիւնը կեդրոնացուցին Յիսուսի վրայ եւ ո՛չ թէ ուրիշ բանի մը վրայ, այնպէս ալ մենք, երբ եկեղեցի երթանք՝ պէտք է մեր հայեացքը կեդրոնացնենք Յիսուսի վրայ:

Միրելի ընթերցող, ՃՐԱԳ թերթը ամէն Կիրակի կը բաժնուի մեր ժողովուրդին, եկեղեցիներու բանկային մօտ: Նաեւ՝ Facebook-ի վրայ փնտռել «Jerak կամ ՃՐԱԳ», ապա սեղմել «Like»ը, կարդալու կամ անդամագրուելու համար:

ՀԱՍՅԷ.

ՃՐԱԳ ԸԱԲԱԹԱԹԵՐԹ - ԱԶԳԱՅԻՆ ԱՌԱՋՆՈՐԴԱՐԱՆ ԼԻԲԱՆԱՆԻ - Bourj-Hammoud, P.O.Box 80810 -Tel/Fax:01-258300- facebook-ի էջ jerak ճրագ թերթ



ԿԻՐԱԿԻ ՕՐԵՐՈՒ ԱՍՏՈՒԾԱՆՉԱԿԱՆ ԸՆԹԵՐՅՈՒՄՆԵՐ Տիմ. 2.11-15: ՅԻՍՈՒՍ ԵՐԻՍՏՈՍԻ ԱՒԵՏԱՐԱՆԸ ԸՍՏ ՄԱՏԹԷ ՈՍԻ 1.18-25

Այսպէս պատահեցաւ Յիսուս Քրիստոսի ծնունդը: Իր մայրը՝ Մարիամ, նշանուած էր Յովսէփի հետ, սակայն նախքան ամուսնութիւնը Մարիամ յղի մնաց Սուրբ Հոգիէն:

Յովսէփ՝ անոր նշանածը, արդար մարդ մը ըլլալուն համար չուզեց հանրութեան առջեւ խայտառակել զայն, այլ խորհեցաւ լռելեայն ետ ընել իրենց նշանախօսութիւնը: Մինչ այս մասին կը մտածէր, ահա Տիրոջ Հրեշտակը երագի մը մէջ երեւցաւ իրեն եւ ըսաւ. «Յովսէփ, Դ-աիթի որդի, մի՛ վախճար ամուսնանալու նշանածիդ՝ Մարիամի հետ, որովհետեւ իր մէջ յղացուածը Սուրբ Հոգիէն է: Որդի մը պիտի ծնի եւ զայն պիտի կոչես Յիսուս, որովհետեւ անիկա իր ժողովուրդը իրենց մեղքերէն պիտի փրկէ»:

Այս բոլորը պատահեցան, որպէսզի կատարուի այն ինչ, որ Տէրը ըսաւ Եսայի մարգարէին միջոցաւ. «Ահա կոյսը պիտի յղանայ եւ որդի մը ծնի, եւ զայն պիտի կոչեն Էմմանուէլ», որ կը նշանակէ Աստուած մեզի հետ:

Երբ Յովսէփ արթնցաւ կատարեց ինչ, որ Տիրոջ հրեշտակը հրամայեց իրեն եւ ամուսնացաւ իր նշանածին՝ Մարիամի հետ, բայց չյարաբերեցաւ անոր հետ, մինչեւ որ իր անդրանիկ զաւակը ծնաւ եւ զայն Յիսուս կոչեց:

ՇՆՈՐՀԱՒՈՐ ՆՈՐ ՏԱՐԻ ԵՒ ՄՈՒՐԲ ԾՆՈՒՆԳ ԲՐԻՍՏՈՍ ԾՆԱՒ ԵՒ ՅԱՅՏՆԵՑԱՒ ՉԵԶԻ ՄԵԶԻ ՄԵԾ ԱՒԵՏԻՍ

ԿԻՐԱԿՆՕՐԵԱՅ ՃԱՇՈՒ
ԸՆԹԵՐՅՈՒԱԾ

ՊՕՂՈՍ ԱՌԱՔԵԱԼԻ ՆԱՍԱԿԸ
ՏԻՏՈՍԻՆ
2.11-15

Որովհետև Աստուած իր շնորհքը յայտնեց, որպէսզի բոլոր մարդիկ փրկուին: Այդ շնորհքը մեզ կը մղէ որ անհաւատ կենցաղէ եւ աշխարհիկ ցանկութիւններէ հեռանանք, զգաստութեամբ, արդարութեամբ ու բարեպաշտութեամբ ապրինք այս աշխարհի մէջ, եւ յոյսով սպասենք այն երջանիկ օրուան, երբ մեր մեծ Աստուածն ու փրկիչը՝ Յիսուս Քրիստոս որ փառքով պիտի յայտնուի: Որովհետև Քրիստոս իր անձը տուաւ մեզի համար, որպէսզի մեզ ազատէ մեր բոլոր անօրէնութիւններէն, եւ մեզ մաքրելով իր սեփական ժողովուրդը դարձնէ, բարի գործերու նախանձախնդիր:

Այս բաները սորվեցուր հաւատացեալներուդ: Քաջալերէ՛ զանոնք եւ ի հարկին յանդիմանէ հեղինակութիւնդ գործածելով, այնպէս որ ոեւէ մէկը ղեկը չարհամարիէ:

ԱՌԱԿ Ը.

Կ'աղայչեմ ձեզի ո՛վ մարդիկ, խօսքս ձեզի է, որ կ'ուղղեմ. ո՛վ պարզամիտներ խորագէտ եղէք, ո՛վ անմիտներ խրատս պահեցէք ձեր սրտերուն մէջ. լսեցէ՛ք զիս, որովհետև աղուոր բաներ պիտի ըսեմ ձեզի, շրթներս ուղիղ թելադրութիւններ պիտի ընեն ձեզի. ես միշտ ճշմարտութիւնն է, որ կը խօսիմ: Ինձի համար պիղծ են ստախօս լեզուները:

ԻՆՉՈ՞Ւ ՄՈՍ ԿԸ ՎԱՌԵՆՔ
ԵԿԵՂԵՑԻՈՅ ՍԷՋ

Մովի գործածութիւնը առհասարակ՝ հարուստ եւ խորունկ իմաստ ունի: Ծիսական կեանքին մէջ ան կը խորհրդանշէ Քրիստոս՝ աշխարհի լոյսը, որ կը հալածէ մեղքի խաւարը: Անձնական գործածութեան պարագային միշտ աղօթքը կ'ընկերանայ անոր: Պալացող մոմը աղօթքով, մեզի միշտ կը յիշեցնէ որ «Լոյսի եւ ցերեկի որդիներ ենք», ինչպէս Պօղոս առաքեալ կ'ըսէ (Ա. Թեղ. 5:5), պատրաստ ստեղծագործելու բարի գործեր, նման մեր արարիչ Աստուծոյ, եւ ըլլալու լոյս, հոն ուր խաւար է: Ննջեցեալի հոգւոյն, հիւանդի առողջութեան, գործի յաջողութեան համար վառուող մոմը աղօթքով, երախտագիտութեան համեստ արարք մըն է առ Աստուած, խնդրելով իր կամքին կատարումը ի լուսաւորութիւն ապրող ու զինուորագրեալ եկեղեցւոյ անդամներու սրտերու ու մտքերու, եւ ի հանգիստ՝ ննջող ու յաղթական եկեղեցւոյ անդամներու հոգիներուն:

ԱՂՕԹՔ Ե.Ասորի

Փրկէ՛ զիս, Տէ՛ր, սատանային գաղտնաձիգ նետերէն, որ բազում մեքենայութիւններով պատելով կը պաշարէ զիս: Յափշտակելով միտքս, կը գերեվարէ մեղքերու ցանկութեամբ թշնամիներուս կողմէ զիս ծաղր ու ծանակի ենթարկելով:

ՍՈՒՐԲԵՐ ԵՒ ՏՕՆԵՐ

Յիսուսի Ծննդեան եւ Սկրտութեան տօնի խորհուրդը

Տօները կը բաժնուին երկու մասի՝ Առաքելադիր եւ Հայրապետագիր: Առաքելադիր տօներէն են Ծննդեան, աստուածայայտնութեան, Մկրտութեան, Համբարձման, Հոգեգալստեան եւ Քրիստոսին վերաբերող միւս տօները, որոնք սահմաններ են առաքեալները: Միւս տօները սահմաններ են եկեղեցւոյ Հայրապետները: Հայ եկեղեցին ունի հինգ մեծ տօներ (Տաղաւարներ, Աստուածամօր վերափոխումը, խաչվերացը: Եւ այսպէս, առաջին տաղաւարը Յիսուսի Ծննդեան տօնն է: Աստուած մարդացաւ, մարդոց մեղքերը վերցուց, չարչարեցաւ եւ մահուան դատապարտեցաւ մեզի համար, որ յաւիտենական կեանքի արժանացնէ: Հայերը այդ տօնը՝ Ծնունդը, աստուածայայտնութեան եւ մկրտութեան հետ միասին կը կատարեն Յունուար վեցին: Մկրտութիւնը յիշատակն է Յորդանան գետին մէջ Անոր մկրտուելուն՝ Յովհաննէս Մկրտիչի ձեռքով: Աստուածայայտնութեան կը կոչուի, որովհետեւ Աստուծոյ փառքը յայտնուեցաւ մեզի:

Հարց. Ինչպէ՞ս կը կատարուի Ծնունդն ու Մկրտութիւնը եկեղեցիէն ներս:

Պատասխան. Յունուար 5-ին երեկոյեան կը կատարուի ճրագալոյց Աստուածայայտնութեան՝ կը վառեն բոլոր կանթեղները եւ մոմերը: Կը մատուցուի Սուրբ Պատարագ: Կը կարդացուի Աստուածաշունչի առաջին Գիրքի՝ Ծննդոցի Ա.-Գ. գլուխները, ուր կը յիշատակուին արարչութիւնը, մարդուստեղծումը, անկումը:

Այս ամէնուն նպատակն է ցոյց տալ, որ Յիսուսի ծնունդով կատարուեցան բոլոր մարգարէութիւնները: Անոր յայտնութեամբ մարդը Աստուծոյ միանալու, Աստուծոյ Թագաւորութիւնը մըտնելու ճանապարհ գտաւ: Աստուածաշունչի առաջին մարգարէութիւնը (Ծննդոց Գ. 15) կատարուեցաւ: Ան «պիտի ջախջախէ անոր գլուխը»: Պատարագէն ետք կը կատարուի հսկումի արարողութիւնը: Առաւօտեան, 6 Յունուարին, կը մատուցուի Ս. Պատարագ, որմէ ետք՝ Զորօհնէք, Յիսուսի մկրտութիւնը (ժողովուրդը կ'ըսէ՝ խաչը ջուրը կը դնեն): Յիսուս սրբեց ջուրը (ջուրը օրհնուեցաւ). պատարագիչը Սուրբ Միւռոն կը կաթեցնէ ջուրին մէջ, կ'օրհնէ: Սովորութեան համաձայն, ժողովուրդը այդ ջուրէն շիշերով տուն կը տանի, որպէս բուժիչ դեղ հիւանդներու համար: Յետոյ քահանան ժողովուրդին հետ կ'երթայ տունները՝ աւետելու Յիսուսի ծնունդը: Այստեղէն է, որ յառաջ եկաւ տնօրհնէքի սովորութիւնը: Աւետիս տանելու սովորութիւնը մինչեւ վերջերս պահպանուած էր արեւմտահայերուն մօտ: 6 Յունուարի առաւօտուն կանուխ կ'երթային տունները եւ կ'երգէին Ծննդեան շարականներ:

ՈՍԿԵՂԷՆ ՀԱՄԱՐ

Թող ձեր խղճմտանքը մաքուր ըլլայ, որպէսզի ամօթով մնան անոնք, որ ձեր մասին կը չարախօսեն, ձեր քրիստոնէական բարի կենցաղը բամբասելով: (Ա. Պետրոսի 3.16)